

MAGABBUNNARI

A MARENA

Eranu tempi di verra e sfullamentu
e, supr'o spissu, i murriti 'nta li manu,
'n cumpagnia di 'Nzulu e di Pippinu
nisciamu 'n chianu, a fari matascini.

Riordu: un jornu, a nisiuta di la scola,
ucchiammu du' peri di marena
carrichi stoccu, 'n mezz'un pezzu 'i vigni,
e fu dicisu daricci l'assartu.

E 'nfatti, a sira, all'ura cuncirtata,
n'abbintammu supra 'dd'arvuliddi
e a la chiaria di stiddi e di la luna
li scarricammu quantu ni fu datu.

N'arritruvammu doppu 'na mezz'ura
'nt'on postu chiù sicuru, fora manu,
p'arripusari un pocu di la cursa
e fari ... u risucuntu da' marena.

'Nzulu,(n'avia chini li sacchetti)
ia dicennu ch'eranu 'nto duci
e cu l'ossa chiuttostu nicareddi.
Iu ... 'n'avia propriu persu tempu:

m'avia incutu nun sulu li sacchetti
ma puru u pettu, dintra la cammisa.
Pippinu 'nveci, s'avia incutu a panza;
ma p'unн'esssiri menu di niatri

avia manciatu a tipu leva-pilu.
'Nfatti, a propositu di l'ossa,
iddu 'nsistia chi ossa nun ci n'era:
si l'avia agghiuttutu pari pari.

I DACALA' (1)

Ogn'annu, 'nte jorna 'i carnival,
'n cumpagnia di 'n'amicu ch'è avvucatu,
appizzavamu 'na speci 'i dacalà
fatti d'un modu chi ora vi lu dicu.

Dacalà! Era 'n'arma cirbuttana
fatta di canna, longa quant'un parmu,
chi sciusciannu sparava u dacalà
ch'era un cartasu, c'a spingula davanti.

'Sti dacalà l'appizzavamu darrè
(era di 'nvernu, li genti ch'i cappotti)
e a quantu deci metri 'i luntananza
faciamu centru a tipu carrabbina.

Ma a li voti, voi c'a luntananza
succidia ch'era chiù vicina;
voi chi la sciusciata
capitava nesciri chiù forti;

voi chi la pirsuna
pi casu cappottu nun n'avia;
o' postu d'appizzari u dacalà
ci faciamu 'na speci di gnizioni.

(1) Pendente di carta

A CASCITTINA

Eranu i tempi di la scola media
(sicunna classi du tennicu Calvinu)
e, mancannu u profissuri di talianu,
mannaru 'n canciu 'n'atru profissuri,

cinquantinu, maniscu, un pocu surdu,
chi parlava a tipu campagnolu
(avia 'na vuci tanta e ni dicia di vui)
e all'occurrenza ... dava li pidati.

Tintu cu capitava p'i so' manu
o puramenti a tiru di so' pedi!
Ma a 'dd'età li picciotti sunnu sperti;
a 'dd'età a cinquant'anni sunnu vecchi;

e, un pocu pi sapillu surduliddu,
un pocu pi pruvari la spirtizza,
un pocu p'aviri li murriti,
dicisi un jornu di purtari a scola

'na cascittina truvata 'nta 'na pupa
chi dicia "mamà" quannu si vutava.
E accussì fù. Cuminciata la lizioni
vutai la cascittina; e a lu "mamà",

Pucciu, u cumpagnu di lu bancu appressu
('n verità lu chiamavamu "Purceddu"
picchè era tunnu tunnu e 'nsasizzatu)
scattau cu 'na risata c'un vi dicu.

Lu prufissuri, puru s'era surdu,
(a vista 'nveci nun ci difittava)
amminazzau a me' cumpagnu bonu bonu
cridennu c'avia fattu cu sa' chi.

Passau quarchi minutu e arrè: "mamà".
'Sta vota u prufissuri u pircipiu
e si muddau o' drittu pi Purceddu;
l'attrappau e ci detti 'na pidata

chi lu fici vulari fora 'a porta
tra li vrazza du' zu' Etturi, u bidellu.
Passaru l'anni; e quannu mi 'ncuntrava
Purceddu ...s'arriurdava 'a cascittina.